



Svjedočio uposlenik SIPA-e

Svjedok otkrio ko je prijavio Miletić

Istražilac SIPA-e ispričao je na suđenju kako je došlo do otvaranja istrage protiv sutkinje Azre Miletić i drugih. Sedin Salčinović kazao je da se pojavio informator sa podacima o korupciji u pravosuđu.

Ispričao je, kako je rekao svjedok, da je sutkinja Miletić postavljena u predmetu Ramo Brkić i drugi, kao i da je zaštićeni svjedok S-1 sa njom u dobrim odnosima i da je "ima u šaci". Salčinovića su, kako je ispričao, zanimali motivi prijavljivanja sutkinje Miletić, a informator mu je odgovorio kako se ne može pomiriti sa činjenicom da se novac od droge koristi za korupciju u pravosuđu. Prema optužnici, Šabić i Brkić su u periodu od jula 2014. do februara 2015. sutkinji Apelacionog vijeća Suda BiH Azri Miletić

obećali novčanu naknadu kako bi utjecali na ishod drugostepenog postupka u kojem im se, između ostalog, sudilo za trgovinu drogom. U optužnici se navodi da je Miletić pristala i od posrednika S-1 primila dio obećanog novca, čime je svjesno prekršila zakon.

Svjedok Salčinović je kazao da su tražili da provedu posebne istražne radnje, odnosno prisluškivanje i tajno praćenje, za što je Sud BiH izdao naredbu u oktobru 2014. godine.

U toj naredbi, dodao je, nije navedeno da se prisluškuje i tajno prati sutkinja Miletić. Prema njegovim riječima, Miletić su po naredbi Suda iz januara 2015. godine počeli prisluškivati i tajno pratiti. Na taj način, kako je kazao, potvrđene su komunikacije svjedoka S-1, Šabića i Miletić.